

MŪRDDHA WAKYA

ONG Swastyastu.

Pūrwwa pangastungkaran tityang Krama Déśa Putung, ring buk pādan Ida Sanghyang Widhi masa sangkan paraning dumadi, bhaṭāra-bhaṭārī sané malinggā ring Pura Pusēh Putung, minakadi pura kahyangan sami sané wéntēn sajroning wawēngkon Déśa Putung, dwaning malarapan saking kréttā warā nugrahan pāduka Bhaṭāra Samudhaya, kāryya puniki kasiddha puput.

Kaping kalih hatur angayubagyan tityang krama Déśa Putung, pingajēng ring Ida Padaṇḍa-padaṇḍa, ida sang rumaga pingajēng déśa, ida dane para panglingsir, Kliyang, Pamangku, minakadi ida dane sang maraga céṣṭakāra, widagdha prajñā wicakṣaṇa sarēng sami, sané sampun sangkaning swéccha lédang sarēng mapawangun ngripta ugēr-ugēr marūpa awig-awig Déśa Pakraman Putung puniki, pacang kānggēn sēpat siku-siku sajroning déśa kantos ka hungkur wēkas.

Talēr majēng ring Pamrintah Daérah Kabupatēn Karangasem, para manggala sané mastika ngiwang patutang awig-awig, tityang ngaturang pangayu bagya, dwaning sampun kasiddhan nuékṣa maritētēs sahā mastikā, kantos marūpa puput.

Munggwing daging ipun mānūt Tri hita Kāraṇa, indik kahyangan gēnah ngadisthana Ida Sanghyang Parama Wiśēṣa. Indik pawongan pinaka krama déśa, indik palēmahan minaka wawidhangan wawēngkon déśa, mabantang antuk lēkita śāstrā-gama, śāsana, paswara, drēṣṭa, minakadi sané sawosan, sané hanūt ring pamarggin dharmma agama kālih dharmma nāgara. Dumadak kasiddhan mamanguhang kajagaddhitan sakala niskala.

ONG Śanti Śanti Śanti, ONG.

**DAGING AWIG-AWIG
DÉSĀ PAKRAMAN PUTUNG**

MURDDHA WAKYA	i
PRATAMA SARGAH : HARAN LAN WAWIDANGAN DESA	1
DWITYA SARGAH : PIKUKUH LAN PATITIS TATUJON	1
TRITYA SARGAH : SUKERTA TATA PAKRAMAN	2
Palêt 1 : Indik Krama	2
Palêt 2 : Indik Prajuru Desa	7
Palêt 3 : Indik Sangkêpan Utawi Paruman	10
Palêt 4 : Indik Kulkul	12
Palêt 5 : Indik Druwên Désa	14
CATHURTA SARGAH : SUKRÊTA TATA PALÊMAHAN	15
Palêt 1 : Indik Karang, Tegal, lan Bangkêt	15
Palêt 2 : Indik Kakayonan	17
Palêt 3 : Indik Wawalungan	19
Palêt 4 : Indik Sukêrtha Pamitêgêp	21
Ka ping 1 : Indik Bhaya	21
Ka ping 2 : Indik Rarampagan	22
Ka ping 3 : Indik Pañanggran Bañjar	23
PANCAMA SARGAH : SUKRÊTA TATA AGAM/	23
Palet 1 : Indik Déwa Yajña	23
Ka ping 1 : Indik Kahyangan	23
Ka ping 2 : Indik Pangaci-aci	24
Ka ping 3 : Indik Pemangku	26
Ka ping 4 : Indik Sukêrta Pura Kahyangan	28
Ka ping 5 : Indik Cuntaka	30
Palet 2 : Indik Rêsi Yajña	33
Palet 3 : Indik Pitra Yajña	34
Palet 4 : Indik Manusa Yajña	39
Palet 5 : Indik Bhuta Yajña	39
SASTHA SARGAH : SUKERTA TATA PAWONGAN	40
Palet 1 : Indik Pawiwahan	40
Palet 2 : Indik Bêlas Marabian	44
Palet 3 : Indik Balu	45
Palet 4 : Indik Santana	45
Palêt 5 : Indik Wawarisan	46
SAPTAMA SARGAH : WICARA LAN PAMIDHANDHA	47
Palet 1 : Indik Wicara	47
Palet 2 : Indik Pamidandha	48
ASTAMA SARGAH : NGUWAH-NGUWUHIN AWIG-AWIG	49
NAWAMA SARGAH : PAMUPUT	50

PRATHAMA SARGAH

Haran lan Wawidangan Désa

Pawos 1

- (1) Désa pakraman puniki mawasta “Désa Pakraman Putung”, salantur ipun kinucap kalih kasuratang sajroning lëkita “Désa Putung”.
- (2) Jēbar kakuwub wawidangannya mawatēs ñatur, manut sakadi kinucap ring sor puniki:
 - ha. Tēpi siring Wétan utawi Kangin: paněpin Désa Pakraman Sibėtan utawi Tukad Pangi;
 - na. Tēpi siring Kidul utawi Kėlod: paněpin Désa Pakraman Manggis lan Pakraman Patėh;
 - ca. Tēpi siring Kulon utawi Kawuh: peněpin Désa Pakraman Duda;
 - ra. Tēpi siring Lor utawi Kalér: pėnėpin Désa Pakraman Sibėtan.
- (3) Désa Pakraman Putung puniki kawangun antuk Bañjar Patus Putung lan Désa Siangolas.

DWITYA SARGAH

Pikukuh lan Patitis Tatujon

Pawos 2

Désa Pakraman Putung ngamanggėhang, mikukuhin lwir ipun:

- (1) Pancasila.
- (2) Undang-undang Dasar 1945.
- (3) Tri Hita Karana.

Pawos 3

Désa Pakraman Putung ngamanggèhang patitis tatujon, lwiripun:

- ha. Nguttamayang tata cara maagama Hindu;
- na. Ngawangunang katreptian sajroning désa pakraman, mangda kasiddhan rajèg katrèptyaning praja;
- ca. Ngawrèdiyang kawicaksanān minakadi kaprajñanan maka larapan gumawé gèmuhanduhing praja;
- ra. Ngamanggèhang kalih ngawrèdiyang drèwéyaning désa, majalaran kawicakṣanan guna laksana manut dharma prawrèti;
- ka. Ngarajègang dharma agama miwah dharma nagara.

TRITYA SARGAH

Sukerta Tata Pakraman

Palèt 1

Indik Krama

Pawos 4

(1) Sané kasinangah Krama désa Pakraman Putung, lwiré :

- ha. Sang sapisira hugi jènèk magènah ring wawèngkon Désa Pakraman Putung lintang ring 3 (tigang) śasih utawi 105 dina, sané rajèg maagama Hindu;
- na. Sang sapisira hugi wèd saking Désa Pakraman Putung, jènèk magènah ring dura désa liwaring Désa Pakraman Putung, nanging kantun mipil ring bañjar pakraman uthawi Désa Pakraman Putung, sané mula pagènahanya nguni.

(2) Papalihan pakraman, kadi hirucap ring sor puniki :

- ha. Krama Siangolas; krama désa sané bulangkèp, sangkaning nama katami maduwé hèmpon ngaci-aci ring désa, majalaran antuk ngamong ngélingang tanah ayah désa, sané pamuponipun patut manggé daging pangaci-aci, sangkaning drèṣṭa kuna;

- na. Krama marĕp: krama désa sané bulangkĕp, sané sampun mipil ring bañjar pakraman utawi Désa Pakraman Putung, matata turun cumek, mapaayahan saurah-arih;
- ca. Krama sorpa, inggih punika, krama désa sané durung mipil ring bañjar utawi Désa Pakraman Putung, sakadi truṇa truṇi, truṇa tuwa, dĕha tuwa, sané kantun kakuhub antuk krama marĕp;
- ra. Krama ṇada, krama sané sampun tan kĕni ayahan:
- ka. Krama balu: krama désa lanang wiyadin istri, sané katinggal séda antuk rabinya, utawi ṇapian sané sĕmpun polih lĕkita saking sang amawarĕt. Wĕntĕn balu camput, wĕntĕn balu masantana;
- da. Krama ring dura désa: sang sapisira hugi wĕd saking Désa Pakraman Putung, jĕnĕk magĕnah ring dura désa liwaring Désa Pakraman Putung, nanging manggĕh mipil ring bañjar utawi désanya nguni;
- ta. Krama Asasabu, inggih punika sang sapisira hugi saking liwaring Désa Pakraman Putung ngawĕngku karang pomahan;
- sa. Krama tamyu, inggih punika krama sané kinucap ring sor puniki:
1. Sang sapisira hugi saking dura désa liwaring Désa Pakraman Putung, jĕnĕk magĕnah ring wawĕngkon Désa Pakraman Putung, tan ngawĕngku karang pomahan, madunungan ring pomahaning krama désa, magĕnah ring pomahan druwĕn Guru Wisĕṣa, hotĕl miwah saluwir ipun, makakubon ngĕnahin tĕgal, pĕlasan ring wawĕngkon Désa Pakraman Putung, nanging kari manggĕh makrama désa ring kamulan désanya, kabuktiang antuk surat sasinahan saking Kĕliang désanya;
 2. Sang sapisira hugi jĕnĕk magĕnah ring wawĕngkon Désa Pakraman Putung, yan tan maagama Hindu, talĕr sinanggah tamyu, tan sarĕng sapolikramaning Désa Pakraman Putung.

wa. Krama ngajag; Sang sapisira hugi rawuh ka jroning Désa Pakraman Putung, nanging tan nekéh magénah irika, patut matur supékša ring Prajuru Désa, kalih ring sang amawa rat. Yan tan asapunika, prajuru désa wénang nundung janma hinucap mangda matinggal saking Désa Putung.

Pawos 5

Ngawit tédun makrama désa, ring désa Pakraman Putung:

- (1) Krama désa sané mawéd, kalih jènèk ring wawèngkon Désa Pakraman Putung, mipil ring bañjar utawi Désa Pakraman Putung, malarapan antuk tatèragan Bañjar/Désa Iwiré: sampun bulangkep, tur nganggé wawanèngan dina usabha Dalèm, sasāmpun widhi wédhana pawiwahan sané kapuput antuk Sulinggih.
- (2) Sang sapisira hugi wéd saking dura désa, magénah ring wawèngkon Désa Pakraman Putung, sampun lintang ring 6 (nèm) sasih, katèrag antuk bañjar utawi désa sané ngawawa pagènahannya.

- (3) Krama désa wéd saking Désa Pakraman Putung, matinggal ka dura désa, wastu malih mawali ka Désa Pakraman Putung:

ha. Yan sangkaning rahayu, kalih saking palugrahan Prajuru Désa patinggalé nguni, wénang mawali mipil ring bañjar utawi Désa Pakraman Putung, nganutin sukrétan bañjar utawi Désa Pakraman Putung;

na. Yan sangkaning tan rahayu patinggalé nguni, yogya Kliyang Bañjar utawi Keliang Désa Pakraman sané katuju, ngatèngahang babawosé ka désa, mangda kabawosan antuk prajuru désa, yan katinutin paněpasan prajuru désa punika, tur kacihnayang antuk maguru piduka ring Pura Pusèh Putung utawi Kahyangan Désa Putung, prasiddha kalugra mipil pinaka krama Désa Pakraman Putung.

Pawos 6

Husan makrama désa ring Désa Pakraman Putung, malarapan antuk:

- (1) Sédá.
- (2) Sangkaning pinunas ngaraga, saha polih palugrahan Prajuru Désa Pakraman Putung.
- (3) Tédah utawi tilar saking agama Hindu:
- (4) Kasépékang saha kahéladang antuk Désa.

Pawos 7

Swadharmmaning krama Désa Pakraman Putung, Iwire:

- (1) Krama désa Siangolas, ngamongin hémponan sané katami, ngélingang ngamèl padruwéyan Désa, ngalaksanayang salwiring karyya sané mula kagadhuh antuk krama Siangolas sanunggil Usabha Kalima ring Pura Pusèh Iwiré: Rějang, Dangsil, Jěrimpěn, talěr mapaayahan, matata turun pinaka krama marěp.
- (2) Krama marěp yogya kěni pāyah-ayahan, tata turun cuměk, ñanggra sarāja karyyan désa, manut hunggwan sowang-sowang.
- (3) Krama sorpa yogya ngaremba saraja karyya sané kapucukin antuk krama désa marěp, yan wéntěn pabuwat saking désa, kahunadikayang antuk Prajuru Désa.
- (4) Krama balu lanang wiyadin istri, tan kěni paayah-ayahan, kalih tata turun hasělé, yan balu punika ngamong karang, kawėkas yan okané lanang wiyadin istri sampun hantės māyahan, patut krama balu punika mayahan matata turun cuměk, bulangkěp antuk piyanak.
- (5) Krama Asasabu, yogya ngaturang panahub ka Désa ngamasa-masa, sanangkěn Usabha ring Pura Pusèh gung artha manut pangarggan bėras 20 kilogram, minakadi ngaturang dāna pawangunan, ri tatkālaning désa mapawangun, ngayum wawangunan sané kadruwé antuk désa, gung artha manut sakasiddhan krama suka.

- (6) Krama Tamyu, yogya ngaturang panahub ka désa ngamasa-masa, sanangkèn Usabha ring Pura Pusèh, gung artha manut pangargan béras 10 kg, talèr ngaturang dana pawangunan, ritatkalaning Désa mapawangun, ngayum wawangunan sané kadruwé antuk désa, gung artha manut sakasiddhan krama suka.
- (7) Krama ring dura désa, yogya ngaturang panahub ka désa ngamasa-masa, sanangkèn Usabha ring Pura Pusèh gung artha manut pangargan béras 10 kilogram, talèr ngaturang dāna pawangunan ri tatkālanning désa mapawangun, ngayum wawangunan sané kadruwé antuk désa manut pararèm.
- (8) Krama sané tan mâgama Hindu, tan sarèng sapolikramaning désa, nanghing tan wĕnang piwal ring Awig-awig, paswaran désa, miwah pamutus pararèm Désa, sané ngindikang tata pawongan kalih palĕmahan.
- (9) Krama désa samiyan yogya saturut ring daging Awig-awig, paswara miwah pamutus pararèm Désa Putung, ngutsahayang mangda kasiddhan mapikolih sakadi patitis tatujon désané kinucap ring hayun, tumus mamanguhang kajagaddhitaning praja.
- (10) Krama désa sané pacang ngadol palĕmahan carik, tĕgal, miwah sané sawosan sané magĕnah ring jroning wawidangan Désa Pakraman Putung, ngadol ring anak saking dura désa, hugi mangda polih palugrahan saking Prajuru Désa, yan tan asapunika, sang ngadol wĕnang dandha gung artha manut pamutus pararèm désa, tur sané kadol punika kawangdéang.

Pawos 8

Phāla-pĕkṣaning krama Désa Pakraman Putung, lwiré:

- ha. Krama désa samiyan yogya polih pasayuban wiyadin pangöban saking Désa, salwiring wicaranya yogya kabawosan antuk Prajuru Désa, manut tata titining wicara;
- na. Krama désa samiyan wĕnang ngalakṣanayang Pañca-yajña, sajroning Désa Pakraman Putung, manut désa kāla patra, śāstra agama, miwah nganutin sitan désa hinucap;

- ca. Krama désa Siangolas, wĕnang polih babagian layuban aci-aci salwir ipun, twas-twasan miwah sawosan sané patut katiba ring krama désa, yan krama marĕp polih babagian layuban, twas-twasan sané kamĕdalang antuk krama marĕp;
- da. Mapawangkid, ñaluk, tan tĕdan maayahan, yogya saking panglokikan kalih palugrahan Prajuru Désa.

Palĕt 2

Indik Prajuru Désa

Pawos 9

- (1) Désa Pakraman Putung kapidabdabin antuk prajuru désa,
- (2) Prajuru Désa Putung Iwiré:
 - ha. Kliang dhĕsa kabawos Pamasekan;
 - na. Juru Rakša kabawos Kabayan;
 - ca. Pañarikan, minakadi Patangan, Iwiré;
 - ra. Kĕliang Bañjar Patus;
 - ka. Kĕliang Krama Désa Siangolas.

Pawos 10

- (1) Sané wĕnang kahadĕgang wiyadin kamanggĕhang dados Prajuru Désa Pakraman Putung Iwiré:
 - ha. Krama désa Siangolas, krama marĕp mawĕd, sané jĕnĕk magĕnah, makrama désa, matata turun, mapaayahan sahurah-harih ring Désa Pakraman Putung;
 - na. Tan cĕdāngga, sakadi pĕcéng, pérot, cungh, lan sapanunggilan ipun sané katandangin kabakta saking wahu hĕmbas;

ca. Wikan mamawos kalih ñurat aksara Bali utawi Latin;

ra. Mabukti tan nahen malaksana corah.

(2) Pidabdab ngadegang Prajuru Désa:

ha. Paruman Désa ngawentenang saseliran, pangawit paruman désa matujuwang sang pacang kahadegang pinaka Pamasékan; yan kantos lintangan ring asiki sané katuju antuk paruman désa, yogya pinilihan, sané akéhan yogya turut;

na. Munggwing ngadegang Kabayan, Pañarikan, saking pañudin Pamasékan, tur sampun kacumponin saking dadya sané kabriyukin antuk krama désa sajroning dadya sane wénten ring sawidangan Désa Putung ring paruman Désa, taler sané akéhan yogya turut;

ca. Sang sapisira hugi sané kaadegang dados Kéliang Bañjar Patus, Kéliang Krama Siangolas, yogya dados patangan Désa Pakraman Putung;

ra. Laminé madég dados prajuru désa, wantah limang warša ngawit saking dina pawintenané, sajaba kapadgatakālan;

ka. Yan sang sampun nahen madég prajuru désa, wenang kasudi malih sajroning paruman Désa;

da. Yan wénten sinalih tunggal piwal kаланing kasudi antuk paruman désa, sang piwal punika wenang katiwakin panglokika, yan tan manut pakşanya, yogya kabawosan antuk paruman désa. Yan jati tuhu pakşanya, paruman désa wenang ñudi sané sawosan;

ta. Ngadegang Kéliang Bañjar Patus, kalih Kéliang Krama Désa Siangolas manut sukrétannya sowang-sowang.

Pawos 11

Swadharmmaning Prajuru Désa :

- (1) Midabdabin désa, krama désa, pacang ngupadi kajagaddhitan sakala niskala, maka darśana Awig-awig désa, paswaran désa, pamutus pararēm désa, nganutin śastra agama Hindu minakadi ugēr-ugēr Nagara.
- (2) Ngarañcana salwiring utsahan désa kapungkur, talěr ngarēñcañayang salwiring sané ñandang pacang wangunang, sané patut hayum, manut lokika désa kâla patra, sané mabuwat, mangda kasiddhan polih palugrahan Guru Wiśéša.
- (3) Mamawosin salwiring wicara sané wētu sajroning Désa Pakraman Putung, niwakang tatimbang, utawi pamutus babawos sané yogya kaputusan sajroning désa pakraman. Yan tan kasiddhan kabawosan ring désa, prajuru désa mituduhang mangda ngaturang ring guru wiśéša mangda kabawosan.
- (4) Mratyakṣa, nulingayang saparipolah prajuru désa, lwiré: Kliyang bañjar patus, kliyang subak, kliyang sėkaa-sėkaa, Pamangku Désa, minakadi sané sawosan sané wéntěn sajroning wawidangan Désa Pakraman Putung.
- (5) Midabdabin salwiring pamarggin haci-haci ring Désa Pakraman Putung, talěr nulingayang krama désa indiké ngalakṣaṇayang Pañca-yajña.
- (6) Ñanggra salwiring pituduh, minakadi saraja karyya saking guru wiśéša, wěrat utawi ringan, sané yogya katiwak ring Désa Pakraman.
- (7) Pinaka duta pacang matěmuwang babawos ring sang sapaśira hugi, yan paindikan punika kapiněh ñandang pacang margginin.
- (8) Wěnanng ngawangunang Pacalang Désa, sané patut ngalanglangin sarāja karyyan désa, nulinga katrěptyan sawawěngkon Désa Pakraman Putung.
- (9) Prajuru Désa patut mawintěn majaya-jaya ring Pura Pusěh Désa Pakraman Putung, déwaśa pawintėnan manut pamutus paruman Désa ri tatkâla ngadėgang Prajuru Désa inucap.

Pawos 12

Phalapėkṣaning Prajuru Désa:

- (1) Luput salwiring wawijilan manut pararēm.

- (2) Wĕnang polih twas-twasan, kalih bagian utawi angkĕpan manut drĕṣṭa.
- (3) Miwah sanĕ sawosan manut pĕmutus paruman dĕsa.

Pawos 13

Prajuru Dĕsa kagĕntosin utawi husan majalaran antuk :

- (1) Sĕda;
- (2) Mabukti sungkan rahat tur suwĕ.
- (3) Mapinunas sangkaning rahayu, sasampun polih lugraha.
- (4) Tutug sĕngkĕr pangadĕgĕ.
- (5) Sangkaning kahusanang antuk Paruman Dĕsa, doning macihna mamurug awig-awig, paswara lan pamutus paruman dĕsa.

Palĕt 3

Indik Sangkĕpan utawi Paruman

Pawos 14

Mungging sangkĕpan utawi paruman, minakadi Pasamuhan sajroning wawĕngkon Dĕsa Pakraman Putung, kadi ring sor puniki:

- (1) Sangkĕpan utawi paruman Prajuru Dĕsa, magĕnah ring Pura Pusĕh Putung, Balĕ Agung, wantilan dĕsa, wiyadin gĕnah sawosan padgatakĕla manut sakabwatan.
 - ha. Sanĕ patut nĕdunin sangkĕpan utawi paruman punika lwirĕ: Prajuru Dĕsa. Pamangku Kahyangan Tiga utawi Dĕsa, kliyang-kliyang subak, minakadi sang sapisira hugi sanĕ kabuwatang antuk prajuru Dĕsa;
 - na. Maka manggalaning mababawosan sajroning sangkĕpan utawi paruman Prajuru Dĕsa, manggĕh masĕkan wiyadin salah sanunggil Prajuru Dĕsa saking palugrahan sang masĕkan.

- (2) Paruman Désa, magēnah ring Pura Pusēh Putung, Balé Agung, wantilan Désa, wiyadin gēnah sawosan ngasaasih sanunggil dina Buda Wagé. Sang yogya nēdunin paruman punika pingajēng sang patut sarēng sajroning sangkēpan désa, mawēwēh pamangku kahyangan désa, kliang bañjar patus, kliang désa Siangolas, minakadi sang sapisira sané kabuwatang manut pangundang wiyadin panuhur Prajuru Désa.
- (3) Sangkēpan utawi paruman padgatakāla, manut wērat wirasāné, sané pacang kabawosan.
- (4) Sangkēpan bañjar patus, Désa Siangolas, sēkēha subak, sēkēha-sēkēha sawosan sané wéntēn sajroning Désa Pakraman Putung kawéntēnang manut awig-awig, paswaran ñané sowang-sowang, nanging hugi mangda ngarihinin ring paruman Désa.

Pawos 15

Tata kramaning sangkēpan utawi paruman, miwah Pasamuhan:

- (1) Saya patut makta pasayaan, tēgēp hétéh-étéh pasayaan salwir ipun, minakadi haturan canang panaracak, saha paségēh.
- (2) Yan kapatut pacang nganggēn babantēn sakabwatan, prajuru Désa yogya mituduhang mangda cumawis, saha ñuksrahang padagingan ring sang kapituduh makaryya babantēn ika.
- (3) Saya wēnang nēpēk tēngēran ping kalih:
 - ha. Kaprathama, sadurung ngawit maturan, pinaka pakéling mangda gēlis carēm;
 - na. Sasampun carēm, ngraris haturan punika kahantēbang, wus punika krama désa matirtha;
 - ca. Ka ping kalih, swaran tēngēran maka cihna sangkēpané sampun ngawit.
- (4) Krama Désa mangda mabusana adat manut drēṣṭa.

- (5) Babawosan sajroning sangkëpan wiyadin paruman, hugi ngupadi karahayon jagat, minakadi ngarajëgang kamuruban Sang Hyang Widhi, majalaran bhawa lakṣaṇa manut catur drëṣṭa lwir ipun: désa drëṣṭa, loka drëṣṭa, kuna drëṣṭa, miwah śâstra drëṣṭa.
- (6) Yan wëntën sinalih tunggal krama ngatëngahang babawos, jroning sangkëpan, yogya kadamyakang. Yan ñandang bawosin, yogya rinawosan, yan tan ñandang bawosin, hantukang ring sang ngamimitin.
- (7) Sané kinucap pamutus babawos, wiyadin paswara jroning sangkëpan, paruman minakadi pasamuhan, yan briyuk sapanggul hanut sang ñangkëpin, yan tan sapunika, asing akéhan wënanng turut manut panglokika. Pamutus babawos yogya kalëkitayang, kalakṣaṇayang manut hanggëran ipun.
- (8) Yan tan puput babawosé sajroning sangkëpan kantos ping tiga sangkëpané, patut katëngahang ka jroning Pasamuhan, pamutus babawos sajroning pasamuhan pinaka pamutus pamëkas.
- (9) Sangkëpan punika kabawos sampun puput, yan sampun nimbalang hurak pagilih sayâ, saha sampun mabacak.-

Palët 4

Indik Kulkul

Pawos 16

- (1) Sajroning Désa Pakraman Putung, wëntën babacakan kulkul kadi ring sor puniki:
 - ha. Kulkul Désa;
 - na. Kulkul Pura;
 - ca. Kulkul Bañjar;
 - ra. Kulkul sëkéha-sëkéha sawosan.

- (2) Mungging swaran kulkul punika mangda mabhina-bhinayan sawiji sowang, manut sor singgih. Yan wéntèn swaran kulkul patèh, karun wiyadin sawer, mangda kapastika salah sawiji antuk sang madruwé.
- (3) Nèpèk kulkul manut Tri Brata Sandhi: dharmma, śima, lakṣaṇa. Tègèsipun :
- ha. Dharmma: swaran kulkul maka cihna wiyadin tatèngèr upacāra Agama wiyadin yajña;
 - na. Śima: swaran kulkul maka cihna wiyadin tatèngèr Pañca-bhaya;
 - ca. Lakṣaṇa: swaran kulkul maka cihna wiyadin tatèngèr patèdunan.
- (4) Indik tatèpèkan kulkul manut pasobhaya, kuna drēṣṭa minakadi paswara.
- (5) Hunggwan nèpèk Kulkul:
- ha. Yan nèpèk kulkul tatèngèr patèdunan, hugi kulkul sané kadruwé antuk krama, sèkèha, sané pacang tédun, katèpèk antuk sang patut ngulkulang;
 - na. Yan nèpèk kulkul tatèngèr Pañca-bhaya, wèngang sahunggwan-hunggwan, asing nampèk gènahé, wèngang katèpèk antuk sang rihinan manggihin bhaya punika, minakadi saking patuduh sang ngawiwèngang;
 - ca. Sahanan swaran kulkul kapañcabhaya inucap patut katèdunin antuk krama désa sami, saha makta prabot manut wigunanipun;
 - ra. Yan nèpèk kulkul tatèngèr upacāra Agama, Déwa yajña, bhuta yajña, mānuṣa yajña, pitra yajña, wèngang kulkul sané wéntèn ring swang-swang gènah upacārané, yan nēlang kulkul sawosan patut wéntèn palugrahan sang ngawiwèngang;
 - ka. Yan kâlanning ngalungayang Bhaṭāra, mēndhak Bhaṭāra, Bhaṭāra turun kabéh, kâlanning pacaruwan désa, sami kulkulé sajroming désa dados swarayang, tatèpèkan manut krama;
 - da. Yan wéntèn sinalih tunggal mamurug, nèpèk kulkul tan manut krama, yogya kabawosan antuk Prajuru Désa, katiwakan panglokika, saha pamidaṇḍha manut paswara.

Palèt 5

Indik Druwén Désa

Pawos 17

Sané kadruwé antuk Désa Pakraman Putung, lwiré :

- (1) Pura Kahyangan Désa:
 - ha. Pura Puséh, Pura Désa utawi Balé Agung, Pura Dalēm;
 - na. Pura Béji.
- (2) Palēmahan sané kahanggén karang pomahan, tēlajakan karang.
- (3) Palēmahan sané kaanggén sétra pakraman, miwah sétra pangilang-ilangan.
- (4) Palēmahan sané kaanggén marggi, rurung-rurung, basang tlabah, sajroning Désa Pakraman Putung.
- (5) Bañjar Patus;
- (6) Sakañcan kalēbutan toya, toya anakan, tihisan, sané dados kahanggén pasuciyan Bhaṭāra, sané dados kahanggén béji, miwah kasalud antuk krama désa, sané dados tantan ka Désa Pakraman, sami kadruwé antuk Désa Pakraman Putung.
- (7) Lēmbaga Perkréditan Désa.
- (8) Salwiring padruwén désa mangda wéntēn lēkitar nya.

Pawos 18

- (1) Sakalwiring haturan, dana punia miwah sané sawosan patut kakērabang olih prajuru désa ring sangkēpan désa.
- (2) Sahananing busana miwah ilén-ilén ring pura patut kasimpēn ring pasimpēnan désa, turmaning katurékṣain olih prajuru désa.

Pawos 19

- (1) Tan kalugra ngadol, ngantahang wyadin ngésahang sahananing padruwén désa, sajawaning sampun polih lugraha saking paruman désa.
- (2) Tègal ayahan désa dados kaadol ring krama désa marèp mawéd, magènah ring wawidangan désa Putung, durung madruwé karang pomahan, ñadya mapaayah-ayahan ring désa, kalih sampun polih lugraha saking paruman désa, yan wéntèn mamurug këni pamidandha manut paswara, tègal ayahan désa punika kajala antuk désa.

**CATURTA SARGAH
SUKRĒTA TATA PALĒMAHAN**

Palèt 1

Indik Karang, Tègal, lan Bangkèt.

Pawos 20

- (1) Palēmahan Désa Pakraman Putung, mahugěr antuk Tri-maᅇdhala, lwiré :
 - ha. Uthama maᅇdhala: palēmahan sané kaanggén karang pura, wiyadin paryangan;
 - na. Madhya maᅇdhala: palēmahan sané kaanggén karang pomahan, gènah wawangunan, sakadi: baᅇjar, sèkolah, hotél miwah sané sawosan;
 - ca. Niᅇta maᅇdhala, palēmahan sané kaanggén sètra, marggi, rurung, tlabah, papunduk, tulak tanggul, miwah sané sawosan.
- (2) Sahanan palēmahan punika, yogya madruwé babalèdan wiyadin watès sané pasti, madruwé marggi, rurung, papunduk sané dados hēntasin.

- (3) Yan wéntěn pakarangan pura, pomahan, tégala, bangkēt, miwah palēmahan sawosan kabēbēng tan madruwé marggi, rurung, miwah papunduk, sang madruwé patut ngatēngahang babawosé ka Désa. Prajuru Désa yogya nēgdēg, ngutsahayang mangda polih marggi malarapan sami suka, yan patut matumbas, manut pangarggan tanah sané kamanggēhang antuk sang amawā rāt, sami katahur antuk sang mamuwatang.
- (4) Yan désa pacang ngalinggahang marggi, rurung, minakadi makaryya marggi, rurung désa, saking sampun hingkup paswaran Désa, yan nganggén tégala, carik druwén désa minakadi tanah ayahan désa, wēnang tan nahur pangarggan tanah punika, nanghing yan madaging tatanduran, papayon, wawangunan salwiré, désa patut ngicchéh prabéya agung alit manut pamutus pararēm Désa kâla punika.
- (5) Sahananing karang pomahan hugi mangda masēngkēr, pidabdab ñēngkēr, magalēng ka dulu, pañēngkēr sané sisi kangin, miwah sisi kalér, patut kakaryyanin antuk sang ngēnahin karang punika, sajaba karang ngēlé, wiyadin karang lingkēhin rurung, palēmahan suwung.
- (6) Sahananing tégala miwah bangkēt, watésé sisi kēlod miwah kauh kapyara antuk sang nruwēnang tégala miwah bangkēt punika.
- (7) Sang sapisira hugi ngēnahin karang tēgēhan, patut naku, tēgēhé asukat natah dangsah, sané tēbēnan, wēnang ñusunin tēmbok.
- (8) Tēlajakan karang patut kapiyara antuk sang ngēnahin karang punika swang-swang, mangda mapikēnoh tur kantēn hasri.
- (9) Yan wéntěn sinalih tunggal ñadya ñalēkšēk wiyadin ngalēklēk babalēdan salwiring babalēdan wiyadin wawatēsan, lwiré: babalēdan wiyadin watēs pura, karang pomahan, bangkēt, tégala, sētra, tlabah, jlingjing, marggi, rurung, papunduk, miwah sané sawosan, yogya katiwakan danḍha manut wērat ringan kahiwanané, ngawaliang saha mahayu sané kasalēkšēk wiyadin kalēklēk, kalih mrayaścitta sakabwatan sané ñandang katibanan pañangaskara.

- (10) Yan hana sinalih tunggal ngalētēhin, ngarucakin, ngarobēdin, ngararabin, palēmahan liwaring pomahan padruwéyan ñané, lwiré: ngutang luu, bangkaan, miwah salwiripun, ñorongang babañon, yogya katiwakan daᅇdha gung artha manut paswara, tur mahayu sané kalētēhan, karucakan, karobēdan, raraban hinucap ring hajēng, saha prayascitta sané ñandang kēni pañangskara.
- (11) Yan wéntēn anak ngēnahin palēmahan sajroning wawēngkon désa Pakraman Putung, tan tinut makrama désa nganutin Awig-awig miwah paswaran Désa, tan kalugra nganggén salwiring padruwéyan désa, tan kalugra ngalakᅇañayang Pañca-yajña sajroning désa Putung, yan tēkaning kapatayan dados sahubang utawi pēñdhēm ring sétra pangilang-ilangan, tan polih pañanggran krama bañjar minakadi pañanggran Désa.
- (12) Yan wéntēn anak tan maagama Hindu ngēnahin palēmahan sajroning Désa Pakraman Putung, patut nganutin Paswaran Désa Pakraman Putung.

Palēt 2

Indik Kakayonan

Pawos 21

- (1) Ngawit nandur tanēm tuwuh ring karang pomahan, patut adēpa agung ngajēroang saking watēs, pradé riwēkas ngalintang watēs patut katotor antuk sang nruwénang.
- (2) Yan wéntēn kakayonan ngungkulin palēmahan anak sawos, sané ngawinang tiyēb, tampyas, ngarobēdin, asing kungkulan wēnang ngatēngahang ka désa, prajuru désa maritētēs saha mituduhang sang madruwé mangda nēbtēb, wiyadin ngarēbah, yan kantos ping tiga pituduh désané tan kalingu, wēnang katiwakan daᅇdha sang anikēl tuduh, gung artha manut paswara, kakayonan punika prasiddha karēbah antuk Désa picuñdhang.

- (3) Pradé wéntèn anak ngarèbah kayu utawi notor kayu mawasana mayanin, sang kèni prabéya wantah sang ngarèbah utawi sang notor mawéwéh pañangaskāra.
- (4) Tanēm tuwuh jroning karang pomahan, tan kalugra tégèh ipun lintangan ring jan palit solas, wiyadin limang métèr, bungkil ipun adèpa agung, wiyadin kalih métèr têngah, saking pañngkèrè ngajrowang, yan mamurug, wéntèn raris ngatêngahang ka dèsa, yogya sang madruwé katiwakan daṅdha gung artha manut paswara, saha notor utawi ngarèbah sajroning tigang dina saking pamuput babawosé.
- (5) Yan wéntèn wit taru mèntik kantos agèng ring babalèdan, watès, salwiring babalèdan mwang watès, wéntèn ngatêngahang ka dèsa, patut taru punika karèbah raris kapinara tiga, apahtigayan mantuk ka dèsa, sang madruwé babalèdan apahtigayan swang-swang.
- (6) Yan wéntèn sinalih tunggal! nundungin tanēm tuwuh, kakayonan, sané kaswatah pacang mamayén, wèngang kabawosang ring sang madruwé. Yan hakas sang madruwé, yogya katêngahang ka dèsa. Prajuru Dèsa nēgdēg tanēm tuwuh wiyadin kakayonan punika, yan manut panglokikan prajuru dèsa, tanēm tuwuh punika yogya tundungin, talèr hakas sang madruwé, patut sēpat gantungin. Yan jati kadi pañwatahé, yogya sajroning tigang dina, karèbah picundhangan. Sang madruwé katiwakan daṅdha gung artha manut paswara, doṣané anikèl tuduh. Yan tan yukti kadi pañwatahé, sang ngatêngahang katiwakan daṅdha gung artha manut paswara, doṣané angadakakèn nora, tanēm tuwuh punika tan karèbah.
- (7) Sang sapisira hugi ñakap tégèl, tan kawasa ngarèbah tanēm tuwuh minakadi salwiring wit taru, tiying, jaka, yan tan polih lugraha saking sang madruwé tégèl punika.
- (8) Yan wéntèn krama nandur pijēr, minakadi salwiring tatanduran sané pacang ngawétuang pamupon tahun-tahunan hugi mangda makaryya pasobaya ring sang madruwé tégèl hinucap, yan punika pinganan durung mawoh kajabutan antuk sang madruwé tégèl, yogya sang madruwé tégèl nahur pañjala sawit-sawit, gung artha manut paswara.

Palét 3

Indik Wawalungan

Pawos 22

- (1) Sané kinucap wawalungan, sakañcan buron suku-pat sané ñadya kapyara, sakadi bawi, banténg, kébo, misa, kambing, miwah sapanunggilan ipun, talér waték makampid, sané ñadya kapyara, sakadi ayam, itik, hangsa, dolong, miwah sabacakan ipun.
- (2) Sang sapisira hugi krama désa sané myara wawalungan suku pat, sajaba hasu, tan wěnanng ngalumbar, sané patut matlusuk, mangda matlusuk, sané tan patut matlusuk, mangda matěgul bawong, sané patut maglogor, makandang, hugi mangda maglogor wiyadin makandang, mangda tan ngarucakin, ngalětěhin palēmahan tani druwé, miwah mamayén krama désa, jana pada, yan hasu mangda mabélat, lwiré makalung bawong, maka cihna wéntěn sané myara.
- (3) Sang sapisira hugi krama désa, myara waték suku kalih, waték makampid, yatnain hugi, mangda tan bangět ngarucakin, ngalětěhin, palēmahan, pomahan, tatanduran druwén anak sawos.
- (4) Tan wěnanng ngangonang, nēgulang, hingon-ingon ubuh-ubuhan, ring palēmahan tan druwé, minakadi tan sasakapan druwé, yan tan kapisukayang. Sang madruwé palēmahan, prajuru désa, pacalang désa, kliyang bañjar asing mamanggihin, wěnanng ñambatsara sang madruwé wawalungan ika, yan hakas sang kasambatsara, wawalungan ika wěnanng taban, prajurun désa yogya niwakang panidandha, manut lokika, gung artha manut paswara.
- (5) Tan wěnanng ngangonang, nēgulang ubuh-ubuhan, ring palēmahan karang pura, kahyangan salwir ipun, minakadi sétra, rurung, papunduk, marggi, tlajakan tan druwé, palēmahan sané kapingitang, karang suhung, miwah sabacakan ipun. Yan wéntěn mamurug, sang madruwé palēmahan, prajuru désa, pacalang désa, kliyang bañjar, asing mamanggihin, wěnanng ñambatsara, saha naban wawalungan ika, katěngahang ka désa, katiwakan dandha gung artha manut paswara, saha ngawaliang, mahayu yan wéntěn karusakan, tur mrayaścitta palēmahan ika sané ñandang prayascita manut panglokika.

- (6) Yan wéntèn maubuh-ubuhan sajroning karang pomahan, hugi tlajan mratyakşayang kandang ipun, mangda tan ngawétuwang bhaya, pañungkan, talër mangda hapik, guritén, sikşa, mangda tan kantos ngalètèhin, ngarobèdin, crobo karang pomahan wiyadin palëmahan pañandingé. Yan wéntèn mamurug, tan sikşa ring hingon-ingon, miwah kandang ipun, wènanng pañandingé ñambatsara, wènanng katèngahang ka Désa, Prajuru Désa nēpasin, wènanng katiwakan daᅇdha manut panglokika kalih paswaran désa.
- (7) Sang sapasira hugi krama désa, ngawangunang kandang wawalungan buwat adol atuku, yan kandang ayam, itik, miwah sapanunggilan ipun, buwat naluhang, miwah adol atuku, dagingan satus ukud, yan kandang wawalungan suku pat, dagingan adasa ukud, sowang-sowang, ika wènanng jroning karang pomahan, yan lintangan ring punika daging kandangé, tan wènanng wangunang jroning karang pomahan, yogya kawangunang ring palëmahan sané mawanèng sa sor ipun satus dēpa saking palëmahan karang pomahan, sèkolah, kantor, pura kahyangan, minakadi gènah sané kakèkèr wiyadin kapingitang antuk Désa Pakraman Putung, sajawaning sami suka ring panyandingé, saha maduwé lèkita palugrahan saking sang amawa rat.
- (8) Yan wéntèn wawalungan ngarucakin, ngarug tatanduran, wènanng taban. Sang madruwé tatanduran ngatèngahang ka désa pramangkin, kabawosan antuk prajuru désa, saha katiwakan daᅇdha manut lokika paswaran désa.
- (9) Yan godél banténg, godél kēbo, godél misa, durung matlusuk, godél jaran, kambing, miwah sabacakan ipun, durung hantēs matégul, tan wènanng taban, yan tan ngajak hinan ipun, yogya salabarang ring sang madruwé.
- (10) Yan bébék, dolong, hangsa, ayam miwah sabacakan ipun, ngarucakin tatanduran, talër wènanng taban. Indiké naban, mangda masakşi, saha kasupéksayang ka désa pramangkin, prajuru désa yogya mamawosin, niwakang panidaᅇdha manut panglokika.

- (11) Yan wéntěn wawalungan ngěléb, maměgat, ngarañjingin palēmahan pura, kahyangan, sétra, karang pomahan, miwah sané sawosan, lokikaněn juga, yan tan ñadya ka lébang, tan yogya taban, wěnanng salabarang ring sang madruwé, yan ñadya ka lébang, wěnanng taban, tur katěngahang ka désa.
- (12) Sang sapisira hugi krama Désa Putung tan kalugra ñorongang babañon' lalětěh kandang wawalungan ka tlabah, jalingjing, sané wéntěn sajroning Désa Pakraman Putung. Yan wéntěn mamurug, katiwakan dañdha antuk désa gung artha manut lokika, saha paswaran désa, tur sajroning pitung rahina saking pamuput babawosé, salantur ipun tan kari sorong lalětěh miwah babañon punika.
- (13) Sang sapisira hugi ngarěrěh hulam ring tukadé, ring tlabahé, ring jalingjingé, miwah sahunggwaning hulam sajroning Désa Pakraman Putung, tan wěnanng nganggén tuba salwir ipun, minakadi listrik, yan wéntěn mamurug, wěnanng katiwakan dañdha gung artha manut lokika saha paswaran désa, tur mahayu sané karusakang.
- (14) Sakañcan dadañdhan, dadoşan sané mungguh ring hajěng, sami mantuk ka désa Pakraman Putung.

Palět 4

Sukěrtha Pamitěgěp

Kaping 1

Indik Bhaya

Pawos 23

- (1) Bacakan bhaya wéntěn lalima kasinanggěh Pañca-bhaya, Iwiré: Jiwa bhaya, Ghni bhaya, Toya bhaya, Artha bhaya, miwah Bhayu bhaya.
- (2) Salwiring bhaya wěnanng gégérang antuk swaran kulkul.
- (3) Rikāla katibén pañca bhaya, sang sapisira hugi kapatut něpěk kulkul, manut tatěngěran bhayané, tur sasampun něpěk kulkul patut matur supěkşa ring prajuru désa, yan tan jati wéntěn bhaya wěnanng kapidandha bėras 50 gantang.

- (4) Tatēngēr swaran kulkul kapañca bhaya manut pasobhaya, drēṣṭa kuna, minakadi paswaran dēsa.
- (5) Sang sapisira hugi krama dēsa sané manggihin, wyadin huning ring panangkaning bhaya, ring kang katibén bhaya, wēnang ngégérang nēpék kulkul manut indik kakulkulan bhaya, raris kadamyakang ring wadēsa.
- (6) Ri kāla wéntēn swaran kulkul bulus tatēngēr bhaya, krama dēsa patut yatna, sayaga, saha srēgēp ngamong prabot wiyadin gagawan sowang-sowang.
- (7) Yan sampun tatas ring bhaya punika, krama dēsa patut matatulung nambakin bhaya punika, manut hunggwan, kalih manut pituduh sang yogya ngawiwēnangang.
- (8) Sang sapisira hugi tan kawaśa majajabur ri kālanning dēsa, krama dēsa katibén bhaya, yan wéntēn sinalih tunggal kacirėnan mamurug, yogya katēngahang ka dēsa, wiyadin katur ring sang amawa rat, mangda kabawosan.
- (9) Yan pinganan bhaya punika sampun kapinēh nahnah, tan pacang ñēngkalén, wēnang kacihnayang antuk swaran kulkul lambat atuludan, wiyadin pasiyar saking sang ngawiwēnangang.

Kaping 2

Indik Rarampagan

Pawos 24

- (1) Rikāla Dēsa Pakraman Putung jagi mapawangun, wēnang ngamargiang rarampagan ring wawidangan Dēsa Pakraman Putung lwiré: wit kalapa, taru cēmpaka, nangka, majagau, tiying minakadi sapanunggilan ipun sané dados anggén lakar wawangunan ring pura.
- (2) Rikāla jagi aci Usabha Kapat, kāryya Tabuh Gēntuh mwanng kāryya Ngēntēg Linggih ring Kahyangan Dēsa, Dēsa Pakraman Putung wēnang ngamargiang rarampagan raramon lwiré: ron, busung, ambu, saang, minakadi woh-wohan ring wawidangan Dēsa Pakraman Putung.

- (3) Tata kramaning ngarampag, minakadi témpekan pamargi rarampagan, manut sané mungguh ring paswaran désa.

Kaping 3

Indik Pañanggran Bañjar

Pawos 25

- (1) Saraja karyyan désa, patut kasanggra antuk krama bañjar patus, kalih krama désa Siangolas.
- (2) Salwiring karya Pañca Yajña sané kalakṣaṇayang antuk krama désa sinalih tunggal dados nunas pañanggran bañjar.

PAÑCAMA SARGGAH SUKRĒTA TATA AGAMA

Palēt 1

Indik Déwa Yajña

Ka ping 1

Indik Kahyangan

Pawos 26

- (1) Kahyangan sané wéntĕn ring Désa Pakraman Putung Iwiré:
- ha. Kahyangan Tiga: Pura Pusĕh, Pura Désa utawi Balé Agung, Pura Dalĕm;
 - na. Pura Pamakṣan Puncak Sari;
 - ca. Pura Paibon Iwiré: Pura Paibon Tutuan, Pura Paibon Tangkas Kori Agung, Pura Paibon Pasĕk Gĕlgĕl, ian Pura Paibon Pasĕk Dukuh.
- (2) Pura Pusĕh, Pura Désa, Pura Dalĕm Putung kahĕmponin antuk désa, indik pangaci-aci manut kuna drĕṣṭa, gagaduhan kalih paswaran désa Putung.

- (3) Pura-pura, kahyangan sané sawosan sané kinucap ring hayun, papayon, kalih pangaci-aci kahemponin antuk krama pamakşan pura sané ñungsung Bhařara ring Pura Kahyangan punika swang-swang.
- (4) Munggwing béji, papayon kalih pangaci-acinya, kahemponin antuk krama désa.
- (5) Yan wéntèn karécéhan, wicara, sajroning pamakşan pura, béji, kahyangan, subak sinalih tunggal, wenang katengahang ka désa, prajuru désa mamawosin, ñahsahang, nepasin wicarané, mangda kasiddhan mawali landuh jatimula.
- (6) Tan wenang nguwah nguwuhin palinggih Bhařara, sané sampun wéntèn ring pura kahyangan sowang-sawang, mangda kantun manggéh kadi kuna.
- (7) Yan wéntèn pura kahyangan sinalih tunggal, reneng pangaci-acinya, kantos kadaş warşan, yogya prajuru désa mamawosin, maritétés, ngutsahayang mangda kasiddhan mawali kadi jatimula, nanhing pradé tan kasiddhan, majalaran antuk pamutus pasamuhan désa, prasiddha Désa ngawangunang pangupacāra mraliņa Pura punika, mangda tan karañjingan kaumahin antuk Ki Bhuta Kubañdha.

Kaping 2

Indik Pangaci-aci

Pawos 27

Rahina aci ring swang-swang Kahyangan Désa Pakraman Putung Iwiré:

- (1) Usabha Émping nuju rahina tanggal ping tēlulas, wyadin patbélas, utawi Purņama hugi nēmu waya napkala śasih Kasa.
- (2) Usabha Kalima madudonan kadi ring sor puniki:
 - ha. Ida Bhařara malasti ka Sagara kalih warşa apisan;
 - na. Usabha ring Pura Pusēh hééd ipun sakadi ring sor puniki: pangambuhan, pabantēnan, pamiosan, pangrējangan kalih warşa apisan, ring panglēméké kawéntēnang tabuh rah tigang sehēt;

- ca. MUYUH ring Pura Puséh, kalakṣaṇayang sasampun solas rahina Bhaṭāra masinēb.
- (3) Aci Usabha Dalēm, kahargiang arahina nuju panglong ping tēlulas, wyadin ping patbēlas, utawi Tilēm nēmu byantara śaśih Kasanga.
 - (4) Ring rahina pabantēnan nuju usabha ring Pura Puséh kadi inucap ring ajēng, krama Désa Pakraman Putung patut ngawangunang péñjor ring swang-swang pamēdal, pradé wéntēn manurug kadaṇḍa bēras agantang tur kadamyakang ring désa.
 - (5) Ri tatkāla Buda Kliwon Dunggulan, krama Désa Pakraman Putung patut ngawangunang péñjor pinih kasép ring Anggara Wagé Dunggulan ring pamēdalé swang-swang, mungging saya krama désa Siangolas, yogya ngawangun péñjor kalih tungguh, kawangunang ring apit lawang Pura Puséh pinih kasép ring Anggara Wagé Dunggulan, yan mamurug daṇḍa bēras agantang satungguh-satungguh.

Pawos 28

- (1) Usabha Ēmping karyyané kapucukin antuk krama Désa Siangolas, minakadi prabéyan ipun saking Désa Siangolas.
- (2) Usabha Kalima kapucukin antuk krama Désa Siangolas, minakadi prabéyan ipun saking krama Désa Siangolas ian krama Désa Pakraman Putung, mwan piilih-olih rarampagan.
- (3) Upacara ñungsong ring Pura Puséh, ring béji, ring Dalēm kalakṣaṇayang antuk krama Désa Pakraman Putung, prabéyan ipun saking krama désa. Ritatkalaning Usabha Dalēm kawéntēnang pacaruan Manca Satha mawēwēh bantēng uthawi bawi ngalih maṣa silih tunggal.
- (4) Pradé kahyangan kadurmanggalan, patut kawangunang upacara panrayascita sakabwatan antuk krama désa utawi krama pamakṣan pura swang-swang.

Kaping 3

Indik Pamangku

Pawos 29

- (1) Ring swang-swang Kahyangan Tiga, Kahyangan Désa, Pura Paibon yogya madruwé pamangku.
- (2) Pidabdab ngadégang pamangku sakadi ring sor puniki:
 - ha. Ngambil saking katurunan wiyadin waris pamangku;
 - na. Nunas pawuwus Widhi wyadin ñanjan;
 - ca. Kasudi antuk krama Désa Pakraman Putung sajroning pasamuhan désa;
 - ra. Turun sèkar, yan wantah sang kasudi lintangan ring asiki.
- (3) Sané tan wénang kaadégang pamangku lwiré:
 - ha. Cédangga, sakadi pécéng, pérot, cungh lan sapanunggilan ipun;
 - na. Kagéringan tan sidha waras, sakadi sakit hila, ayan, buduh, lan sapanunggilan ipun;
 - ca. Mabukti mapamargi corah.
- (4) Swadharmmaning pamangku lwiré:
 - ha. Niténin lan ñanggra indik kasucian kahyangan;
 - na. Ngantébang haturan ritatkāla kalakṣaṇayang aci, sajawaning sané kapuput antuk Ida Padaṇḍa.
- (5) Sang sapisira hugi pinaka jan banggul pamangku ring Pura Pusèh Putung, minakadi ring Pura Kahyangan sajroning Désa Pakraman Putung, mangda pagèh ngambèl kalih ngalakṣaṇayang sasanan pamangku.
- (6) Sang sapisira hugi krama désa, sangkaning sasèrod, sangkaning kasènéngin antuk Bhaṭāra polih pamuwus ring sasèmburan, minakadi kajujuh kabriyukin antuk krama désa, pacang kaanggèn pamangku, yan kari alaki rabi yogya lanang istri mawintèn.

- (7) Sang kasudi kaanggén pamangku, patut mawintèn ring Pura gènahé dados jan bangga, mungging prabéya kasandangin antuk pamakṣan pura swang-swang, ring Khayangan Tiga antuk krama désané sami
- (8) Pamangku patut madruwé hamongan pura swang-swang, yan tan madruwé hamongan pura, prasidha tan kalugra ngantébang babantén ring pura-pura salwiré, sané wéntèn ring sawawidangan Désa Pakraman Putung.
- (9) Sinalih tunggal pamangku yan katékan pati, yogya tiniwakèn, patut polih patulung prabéya atitiwa saking krama pura sané kahamongin, agung alit patulungé nganutin pamutus babawos kala punika, yan wus tiniwakèn patut kakaryyanang pangélad, wiyadin papégatan antuk krama pura inucap, punika yan pamangkuné kari rajég ngamong swadharmaning pamangku kantos hantaka.

Pawos 30

Twas-twasan pamangku désa lwiré:

- (1) Cacénengan sahanan olih-olihan daging dakṣiṇa lan sasarin canang lwiré:
 - ha. Dakṣiṇa panahuran sosot apahtigayan;
 - na. Sasarin canang apahtigayan.
- (2) Luput babacakan.
- (3) Luput rarampagan lan patigasanaan hamung sami asukat.

Pawos 31

Pamangku kagéntosin majalaran antuk:

- (1) Séda.
- (2) Mapinunas marāryyan, saking patut pinunasé, nānghing tan kari ngalakṣaṇayang dharmmaning Pamangku, kawékas kālani séda, tan polih patulung prabéya atitiwa.

- (3) Saking patut pinunasé, majalaran antuk lingsir, sampun tan mampuh, sungkan rahat tan kéngin waras, kajadayang antuk krama pura, wiyadin désa, kawékas kâlaning séda, patut polih patulung prabéya patatiwan.
- (4) Sangkaning kawusanang, majalaran antuk lakṣaṇa mamurug śasaṇan Pamangku, kawékas kâlaning séda tan polih patulung prabéya patitiwan.

Pawos 32

- (1) Sang sapisira hugi ngaturang dana punia miwah naur sosot patut matur dumun ring prajuru désa, mangda kaungguhang sajroning lēkita, babacakan.
- (2) Yan wéntēn sang sapisira hugi ngaturang jinah, miwang sarupaning barang, punika sami patut kahunadikayang antuk prajuru désa, kliang pamakṣan pura swang-swang, mangda kasiddhan mapwara hayu, haturan punika kaungguhang sajroning lēkita.
- (3) Yan wéntēn sinalih tunggal nahur sasangi pacang ngaturang pangodal, hugi mangda ring dina pagantosan piḍalané, sang nahur punagi, wēnang nunas kanti patulung karya ring pamakṣan, sang nahur sasangi ṅuksērahang daging cumēk saprabéyaning pangodal ring pamakṣan pura.
- (4) Yan wéntēn sinalih tunggal nahur sasangi maturan swaran tangguran salwiring tatabuhan, sasolahan minakadi salwir ipun, munggwing prabéya punika sami kaangganin antuk sang masasangi.

Ka ping 4

Indik Sukrētan Pura Kahyangan

Pawos 33

- (1) Ri kâlaning maturan hamung Pamangku ring kahyangan punika sané dados mungguh tēdun ring palinggih-palinggih pura kahyangan hinucap, minakadi sang sampun polih lugraha saking Prajuru Désa, yan wéntēn mamurug katiwakan pamidaṇḍha mrayaścitta palinggih punika.

- (2) Pamangku sané patut ngantebang babantèn ring Pura, wantah pamangku sané kadruwé antuk Pura punika, yan néntèn wéntèn pamangku ring Pura punika utawi kapyalang, dados narad pamangku sawosan, saking palugrahan Prajuru Désa.
- (3) Tan kalugra masumpah, macoran, sajroning pura kahyangan sinalih tunggal, sajaba sangkaning wicara pura hinucap, talér saking pabuwat krama pamakšan Pura, utawi pabuwat Krama Désa sané ngempon pura punika.
- (4) Tan kalugra wāk capala, hasta capala, pāda capala, miwah sapanunggilan ipun, sajroning pura kahyangan, yan macihna wéntèn mamurug, wéntèn raris ngatengahang ka désa, yogya tiniwakan daᅇdha pamarisuddhan kahyangan.
- (5) Tan kalugra malakᅇana kantos ngawétuwang byota ring pura kahyangan, yan wéntèn mamurug, kantos maywadi ring pura, yogya tiniwakan daᅇdha gung artha manut pangarggan bēras adaᅇa kilogram kang sadiri, saha marisuddha kahyangan punika.
- (6) Sang sapisira hugi kacuntakan, salwiring cuntaka, yan durung mabrēsih, tan kalugra ngaraᅇjing ka Pura Kahyangan, yan katēngēr wéntèn mamurug, yogya tiniwakan daᅇdha marisuddha kahyangan punika.
- (7) Sēdahan hēngēngan miwah sapanunggilan ipun tan kalugra masēha ring Pura Kahyangan sinalih tunggal, yan wéntèn mamurug, yogya daᅇdha gung artha manut paswara, saha ngawangdēyang masēha.
- (8) Tan kalugra ngawētēngang kaklēcan, jajudén, sajroning sutēr paᅇngkēr pura kahyangan, yan wéntèn mamurug, sang ngalakᅇanayang katur ring sang amawa rat, tur kaklēcan, jajudén punika kawangdēyang.
- (9) Tan kalugra makta salwiring sané kasinanggih tan suci ngaraᅇjing kajroning sutēr Pura Kahyangan, yan wéntèn mamurug, yogya sang mamurug marisuddha pura punika.
- (10) Sang sapisira hugi ri kālaning makēmit ring Pura Kahyangan yan mērēm, tan kalugra madukan lanang istri, sajaba anak sané kapinēh kari alit durung rumaja putra, yan mamurug kēni daᅇdha manut pangarggan bēras adaᅇa kilogram kang sadiri tur mrayaᅇcita pura punika.

- (11) Pamakšan swang-swang Pura Kahyangan sawawengkon Désa Pakraman Putung kalugra madruwé sukréta ndiri-ndiri, nānghing tan dados singsal ring pasukrétan Désa Pakraman Putung.
- (12) Pura kahyangan tan wēnang anggén sajaba ngalakṣaṇayan^o upacāra Agama Hindu, yan wéntēn mabhukti mamurug, sang malakṣaṇa kawangdéyang, tur pakarddhināné kapucēh, saha sang ngalugrahin kadaṇdha manut pangarggan bēras adasa Kilogram, mawewēh ngawéntēnang upacāra pañangaskara pabrēsihan.
- (13) Yan wéntēn macihna anak wiyadin sang sapasira hugi, katēdunan utawi kapangluh sajroning pura kahyangan sawawengkoning Désa Pakraman Putung, mababawos minangkēnang pangandikan Ida Ratu Sasuhunan utawi Bhaṭāra, ring gēlis tunasang tirtha laluputan mangda gēlis hudép, pradé sasampun kakētisin tirtha, kantun ngatémél maséra-maséro, ngawētawang sumandéya kayun pamakšané, irika patut pintonin, hambalang toya apané, cēlēbang liman nāné makakalih, yan mabhukti tan bēlus, nāndang gēgā pangandikan Bhaṭāra, yan padé bēlus, tan nāndang gēgā, gēlisang gingsirang gēnahang mangda doh saking pura punika.

Kaping 5

Indik Cuntaka

Pawos 34

- (1) Sang sapasira hugi krama désa, sané kahanan cuntaka, tan wēnang ngarañjing ka Pura Kahyangan, ka pañuciyān kālaning ṅuci gēning, minakadi gēnah salwiring gēnah sané kinucap suci pingit. Tan wēnang ngaryyanin saji salwiring saji sané pacang katur ka sanggar tawang, sakadi suci gening, minakadi bantēn salwiripun sané jaga katur ka pura, miwah sané katur ring pitra piṇdha. Mungging bantēn sané pacang katur ka Prajapati, Dalēm panguluning sétra, dados karyyanin ring umah sang cuntaka kālaning ngupakāra sawa.
- (2) Lwir sané kinucap cuntaka:

- ha. Anak istri kălaning ngrajaswala, suwén cuntakané, saking ngawit ngrajaswala, kantos ñat, macihna sampun malukat;
 - na. Sang ngantén lanang istri, suwéné cuntaka, ngawit saking rahina panganténané, wiyadin rahina marangkaté, kantos puput mabyakawon, saha samayut prayaścita, malukat matirtha;
 - ca. Râma réna cuntaka sangkaning madruwé oka, suwéné saking mbas anaké alit, kantos pětang daśa kalih dina;
 - ra. Anak istri karuron, suwéné cuntakané pětang daśa kalih dina saking karuron.
- (3) Cuntaka malarapan antuk kasédayan, kapatiyan :
- ha. Yan sang ngarëpin, minakadi sang magënah sajroning karang pomahan sang séda, suwénné cuntaka, saking wawu séda kantos puput panglëmëk karyyané, mawanëng malih tigang dina, punapiké mapëndhëm, lwih yan atitiwa, macihnayang punah cuntakané antuk marërëbu, malukat;
 - na. Sang polih niñjo, ngarap śawa, ngamël saha ngarëmbat sahétéh-étéh upakâra pula-paliming śawa, cuntaka adina, punah cuntakané macihnayang antuk malukat;
 - ca. Yan sang mañjing mijil ring umah sang ngrakśa śawa wyadin layon, sasuwén śawa wiyadin layoné karakśa, patéh cuntakané kadi sang ngarëpin śawa ika;
 - ra. Yan sang mañjing mijil ring umah sang ngrakśa śawa wiyadin layon, sangkaning aniñjo, punah cuntakané sasampun masiram;
 - ka. Yan sang polih ñëmbah śawa, mangan paridan śawa wyadin layon, punika talër kabawos cuntaka, suwéné cuntaka kantos sasampun husan malukat.
- (4) Cuntaka sangkaning malakśana mamitra ngalang, suwéné cuntaka salaminé mamitra ngalang.

- (5) Anak wētu sangkaning smara dudu utawi tan pawidhi widhana pawiwahan, babiñjat, punika talèr cuntaka, suwénné cuntaka, salaminé durung wéntèn mēras, wiyadin nuduk ngangknin piyanak, utawi nganggén dadaman.
- (6) Cuntaka sangkaning mabhukti madruwé pañungkan sané tan siddha waras salaminé, kadi hangganing hila, buduh, ngawijilang rēgēd saking silit, bhaga, purus, tan hēnap mamērēs, brung borok tahunan mabañēh, miwah salwir punika, suwéné cuntaka, salaminé tan waras.
- (7) Cuntaka sangkaning cédangga sané kabakta saking wawu mbas saking garbhawaśaning ibu, punika tan kawēnang napak palēmahan pañuciyan gēnah ñuci gēning.
- (8) Yan wéntèn sinalih tunggal sang cuntaka antuk ngarakša śawa wiyadin layon, mamanah utawi mapakayun ngarawuhin karyya hayu atma-wédana, minakadi mabhakti ring sang wēnang kabhaktinin, dado,, nanghing tan wēnang ngarap, ngarēmbat, ñuwun, ngamēl, saupakâran puṣpa lingga.
- (9) Yan wéntèn sinalih tunggal krama désa durung tutug cuntaka kadi hucaping harēp, mamurug larangan, yan wéntèn ngatēngahang ka désa, prajuru désa niwakang pamidaṇḍha, yogya sang mamurug marisuddha sakabwatan manut panglokika.
- (10) Yan wéntèn sinalih tunggal anak istri, sangkaning tan mēhâ ngrajaswala sasampun ring pura, wyadin ring genah larangané sawosan, raris kacirēnan, wēnang ya tiwakin daṇḍha tanmēhâ, yogya marisuddha gēnah punika, katulung antuk pamakṣan pura wiyadin pangēmongé sowang.
- (11) Ri kâlanning krama désa tēdun makâryya, sang kacuntakan hamung dados ring niṣṭa maṇḍhalaning pura utawi ring jabayan, yan mamurug wēnang kadaṇḍha mrayaścita.
- (12) Yan wéntèn sinalih tunggal krama désa, kacuntakan antuk ngrakša śawa, wiyadin layon, napkala pagilih pagantosan subak babañjaranya ngaci-aci, ring sinalih tunggal kabhyangan désa, pacaruwan ring désa, sadurung tutug sēngkēr cuntakanya, wēnang tan tēdun mayahan, tan dinosan, anghing yan wéntèn pasadok sang cuntaka ring prajuru désa, yan wus tutug cuntakané, patut narēgtēg

yan kari ngalantur patédunané. mungging piturunan, wawijilan daging salwiripun, yogya katahur narégtèg sasampun tutug sèngkèr punah cuntakané dados kahétang pangargga.

- (13) Yan cuntaka gamya gamana, prajuru désa ñantosang pamutus sang amawa rât, yan sampun wéntèn pamutus saking sang amawa rat, ring Désa katiwakan danḍha kadi ring sor puniki, Iwiré: mangḍa mrayascita raga, gènah malakṣaṇa, kahyangan désa, miwah désa pakraman. Pradé yan sang katiwakan pamidanḍha mamandal, prasiddha désa sané mrayascita désa miwah kayangan, sang mamandal kabawosan ring désa, kicén pamutus antuk prajuru désa, manut pamutus pararèm désa.
- (14) Cuntaka sangkaning mablukti salah timpal, cuntaka ragan sang malakṣaṇa miwah désa pagènahanya, tutug cuntakanya yan sampun sang malakṣaṇa mrayascita pañangaskara raga, gènah malakṣaṇa, désané mrayascita désa.
- (15) Anak luh bëling tan kapariangkèn, suwènné cuntaka kantos lékad raréné saha wéntèn pangupakâra pañangaskara kulawisuddha.
- (16) Yan wéntèn anak mabhukti ñolong smara, cuntaka patèh ring cuntaka gamya gamana.

Palèt 2

Indik Rêsi Yajna

Pawos 35

- (1) Krama Désa Pakraman Putung, yogya ngawreddhiyang kaprajñanan, kaultaman Sang Hyang Aji, aséwaka nunas pawarah ring sang maraga widagdha prâjñan, pingajèng ring sang kasinanggah guru loka.
- (2) Prajuru Désa, Kliyang bañjar patuz, Kliyang krama Désa Siangolas ngutsahayang kawreddhiyan kamuruban kaultaman Sang Hyang Aji, ngawéntèhang pasamuhan-pasamuhan, parèmbugan, pinaka gènah krama désa mamanguhang pawarah-warrah hayu.

- (3) Kālaning diwaśa hayu, wēnang désa atirthayatra, wēnang désa ngaturang punia miwah rēṣi bhojana ring Ida Padaṇḍha, talēr kālaning kâryya utama ring Désa, salwiring kâryya sané kapuput antuk Ida Padaṇḍha patut ngaturang punia, asapunika talēr ring sang matatulung patut mawéh dana.
- (4) Sang sapisira hugi krama Désa Pakraman Putung, yan mapakayun pacang mapodgala talēr mangda wéntèn pasadok pamihuning ring Prajuru Désa, sajaba patut polih palugrahan saking Guru Wiśéśa.
- (5) Prajuru Désa Putung, mamatut pisan, yan krama désané mapunia ring sang prajñan, ring sang widagdha, ring sang satata ngarajĕgang dharmma, pingajĕng ring Ida Padaṇḍha pasūryyân ñané sowang-sowang.

Palĕt 3

Indik Pitra Yajna

Pawos 36

- (1) Pamarggi ngupakâra śawa, hugi manut linging śâstra Agama Hindu, wéntèn makudang-kudang soroh, sakadi hinucap ring sor puniki :
ha. Mapĕṇdhĕm ring prathiwi;
na. Makingsan ring ghni;
ca. Atiwa-tiwa, utawi palĕbon utawi ngabĕn;
ra. Yan rarĕ durung makupak huntu hantaka, wus kĕpus hodĕl hantaka, wēnang ngangĕ pangĕntas bangbang masadhana klungah klapa gadhing, ngaran ngalungah, tan wēnang tiniwākĕn malih;
ka. Yan rarĕ durung kĕpus hodĕl hantaka, pamali ngaran, pĕṇdhĕm juga tan hana pangupakâranya, kĕwala gantĕn utawi hadĕm paicchan Ida Padaṇḍha.
- (2) Sang sapisira hugi krama Désa Pakraman Putung tan kawaśa makta śawa ka désa pakraman, yan śawa ika sampun kĕni pangupakâra śawa, yan wéntèn mamurug, yogya katiwakan daṇḍha, mrayaścita marisuddha désa.

Pawos 37

- (1) Tan kawēnangang mēndhēm, ngēsēng śawa, mīwang atiwa-tiwa ritatkāla aci ring kahyangan déśa lwiré:
- ha. Usabha Ĕmping arahina;
 - na. Usabha Kalima, daśa dina, ngawit saking ménjangang Bhaṭāra lunga malasti ka sāgara kantos Bhaṭāra masinēb;
 - ca. Ņungsung arahina;
 - ra. Patirthan sabilang paibon saking ngiasin bhaṭāra kantos masinēb;
 - ka. Muyuh arahina;
 - da. Usabha Dalēm arahina;
 - ta. Karya űuci gēning ring kahyangan déśa, ngawit rahina tēdun űuci kantos dina ngalēmēkin;
 - sa. Yan ritatkālaning wēntēn kāryya agung sané patut kasungkēmīn antuk Déśa Putung, minakadi jagat Bali.
- (2) Sajawaning larangan inucap ring hajēng, talēr tan kawēnangang mēndhēm, ngēsēng, atiwa-tiwa, utawi ngabēn manut larangan dina sakadi ring sor puniki:
- ha. Prawani, Purṇama;
 - na. Tilēm;
 - ca. Budha Kliwon;
 - ra. Budha Wagé;
 - ka. Wrēspati Wagé Sungsang;
 - da. Saniścara Kliwon;
 - ta. Tanggal mīwang panglong apisan;
 - sa. Sēmūt sadulur;
 - wa. Kala gotongan;
 - la. Pasah;

- (3) Yan wéntěn krama désa ngurung sawa, macamaña, mabrēsih, kawénanganya, tan kalugra lintangan ring tigang sasih ngawit saking dina sédané, yogya mūrpnama tilēm, miwah salwiring upacara rarahinan, yan kālanning angurung sawa, sajroning Désa Pakraman Putung kawangunang Karyya Agung kantos ñuci gëning, lwiré matabuh gëntuh, bhaṭāra turun kabéh, kāryya Agung ring Basakih, yogya tumpang saluné tédunang saking baléné, gënahang ring natah umahé, saking Bhaṭāra kodhal kantos lida masinéb.

Pawos 38

- (1) Śawa sané patut pëndēm pramangkin lwiré:
- ha. Séda ngadut mañik;
 - na. Séda kabéběng;
 - ca. Séda ngěmbasang oka, sadurung okané kēpus hoděl;
 - ra. Śawan anak alit sané durung makupak huntu;
 - ka. Śawa sané kēni pañungkan ngalahlah;
 - da. Yan tan wéntěn déwaśa, kapëndhēm laku kingsan.
- (2) Pradé wéntěn krama désa séda rikālanning rahina kēkēran désa śawané dados kapëndhēm, nanghing pamarginé wěngi, tan dados kabintakin, laku kingsan ngaran, yan wéntěn mamurug kadandha bēras 30 gantang, tur mawēwēh upacāra pañangaskāra sakabuatan.
- (3) Pradé wéntěn anak séda sangkaning salah pati utawi ngulah pati, mati kapangawan, minakadi salwiripun, désa tan ngalarangin, yan sawa punika tiniwakěn pramangké, sara lédang sang madruwé, minakadi lida Padandha utawi sulinggih sané pacang muput.
- (4) Yan wéntěn sawa tan kapariangken ring wawengkon Désa Pakraman Putung, hingaranan bedagan désa, yogya Prajuru Désa nguduhang krama désa mēndhēm ring sétra pangilang-ilangan, sasampun polih lugraha saking sang amawarāt, kicén bubur pirata saking désa.

- (5) Yan wéntěn sinalih tunggal śawa gēnahé séda wyadin padēm, sajabaning karang pomahan, lwiré ring tēgal, bangkēt, pura, pasar, sēkolah, minakadi gēnah sawosan dudu karang pomahan, yogya sang madruwé wirangé mrayascitta marisuddha gēnah punika, yan sawa tan kapariangkēn gēnah punika patut kaparisuddha kaprayascitta antuk sang madruwé hemponan.

Pawos 39

- (1) Bacakan pamagin atiwa-tiwa utawi ngabén lwiré:
- ha. Śawa Pratéka;
 - na. Śawa Karēsian;
 - ca. Ñuasta utawi rēcadana;
 - ra. Ngabén pramangkin utawi dadakan dados sajroning roras rahina saking wawu séda, mungging déwaśa sakéwantěn dados déwaśané anggén mēndhēm śawa;
 - ka. Yan ngabén ñadya ngarērēh déwaśa, hugi ring kālaning śasih Sada, Kaśa, lan Karo, yan wéntěn sinalih tunggal mamurug, dandha mrayascitta déśa, sang atatulung danḍa bēras agantang sawiji swang.
- (2) Pamargin upacāra ring hajēng, dados niṣṭa, madhya, utama manut śāstra agama Hindu.

Pawos 40

- (1) Sakalwiring upacara upakāra atiwa-tiwa, hugi k margiang ring sētra, sawawaning layon sang sulinggih, sané kalugra antuk déśa, yan wéntěn mamurug kadandha antuk déśa bēras 60 gantang, saha mawēwēh upacara prayascitta pamarisuddha déśa.

- (2) Sawa wyadin tahulan yan samipun nahën keni pangupacāra śawa, tan dados malih kabakta mawali ka désa pakraman, yan wëntën mamurug dandha bēras 60 gantang, saha mrayascitta désa, tur tahulan punika kabakta ka sétra.
- (3) Pradé wëntën anak saking dura désa sané maagama Hindu, sané magēnah ring wawēngkon Désa Putung durung makrama désa katibén pati, ayat mēndhēm uthawi ngēsēng śawa, lan ngalakṣaṇayang atiwa-tiwa ring sétra Putung, patut matur supékṣa ring prajuru désa, yan kalugra patut nahur pananjung batu marupa bēras 60 gantang, salanturnya, yogya ngraris makrama désa.
- (4) Yan wëntën anak saking Désa Pakraman Putung sané wusan makrama sangkaning rahayu, sakēwantën magēnah ring dura désa, pradé riwēkas mawali ka Désa Pakraman Putung patut makrama désa, yan sadurung makrama désa mapikayun pacang mēndhēm śawa, ngēsēng lan ngamargiang upacara atiwa-tiwa, minakadi yajña sawosan, tan kalugra antuk désa, yan mamurug dandha bēras 60 gantang, sang atatulung dandha bēras agantang sawiji swang.

Pawos 41

- (1) Sang sapisira hugi krama Désa Pakraman Putung, yan kālaniṅ angatma wédhana, Iwiré: Ngaroras, patilēman, baligya, tan wēnang ngawangunang payajñan, pétak, ring palēmahan Pura Kahyangan Désa, minakadi kayangan sawosan.
- (2) Sang sapisira hugi wus ngawangun karyya angatma wédana, yogya karang payajñan ika kapraliṅa, sakasép ipun petaṅg daśa kalih dina saking dina kâryyané.-

Palèt 4

Indik Manuša Yajna

Pawos 42

- (1) Sang sapisira hugi krama Désa Pakraman Putung, ngawangunang salwiring upacâra mânusa yajña, tan wĕnang magĕnah ring wawidangan palĕmahan kahyangan pañiwiyan Désa, yan wĕntĕn sinalih tunggal mamurug, wĕnang daᅇdha gung artha bĕras 50 gantang, saha mrayasica marisuddha pura punika.
- (2) Sané kalugra mawintĕn magĕnah ring pura sinalih tunggal, sang sapisira hugi krama désa sané pacang kahadĕgang dados pamangku, pinaka jan banggul Bhaᅇara ring pura kahyangan hinucap, talĕr sané kahadĕgang pinaka prajuru Désa, wĕnang mawintĕn majaya-jaya ring Pura Puseh Putung.
- (3) Indik manuša yajña sané dados kamarggiyang sajroning Désa Pakraman Putung hugi sané nganutin drĕᅇᅇta kuna minakadi śâstra Agama.

Palèt 5

Indik Bhuta-Yajna

Pawos 43

- (1) Sajroning Désa Pakraman Putung, pacaruwan manut hunggwan, kalih sor singgih, lwirĕ :
ha. Pacaruwan Désa sadakâla:
 - Mañca-satha ngamasa-masa, kâla Tilĕming Kasanga, magĕnah ring pĕmpatan agung;
 - Mañca Sanak ngalimang maᅇa, kala Tilĕming Kasanga magĕnah ring pĕmpatan agung;
 - Tabuh gĕntuh kamargiang sakasiddhan.

- na. Pacaruwan désa padgatakāla, ri kāla jagaté kabrēbēhan, kagringan, kadurmanggalan, katibén pañca-bhaya, piwah sané sawosan sané patut caronin;
- ca. Agung alit caru, manut hunggwan acaru, babwatan pacaruwan, kalih niṣṭa madhya uttamaning caru.
- (2) Pacaruwan ring pura-pura kahyangan, pamrajan, dadya, salwiré, manut drēṣṭan pura sowang, minakadi awig-awig gagaduhan pura hinucap.
- (3) Pacaruwan ring bāñjar patus, ring Kajēng Kliwon śasih Kawulu, caru Mañca Satha, ngararis pacaruwan ring karang pomahan sowang-sowang.
- (4) Ring Pura Dalēm caru mañca satha sanunggil Buda Wagé Klawu.
- (5) Yan wéntēn sinalih tunggal pura kahyangan, salwiré, rēnēng pacaruné kantos tigang plabuh, wēnang prajuru désa mamawosin, yan wus puput babawosé, yogya maguru piduka, ngawit masasapuh, mangda kasiddhan ngaturang pangaci-aci.
- (6) Pacaron kâlaning Tilēm Kasanga, ring karang pomahan sowang-sowang manut śâstra drēṣṭa, kalanturang antuk brata pañēpiyan.

SASTHA SARGAH

SUKRĒTA TATA PAWONGAN

Palēt 1

Indik Pawiwahan

Pawos 44

- (1) Pawiwahan inggih punika patēmoning puruṣa lawan pradhana malarapan kayun suka citta kadulurin upasākṣi sakala niṣkāla.
- (2) Pamargin pawiwahan kadi hinucap ring ajēng, lwiré:
- ha. Papadikan;
- na. Marangkat utawi ngarorod;
- ca. Kaduduk Mantu;

- ra. Ngunggahin, anak istri ngrauhin anak lanang mapinunas kanggén rabi.
- (3) Pidabdab sang marabian patut:
- ha. Manut kēcaping agama Hindu;
 - na. Nganutin yusa sakirangnya risāmpun munggah dēha truṇa, lanangé sāmpun 19 warṣa, istriné 16 warṣa;
 - ca. Sangkaning suka;
 - ra. Pradé anak istri sané pacang karangkatang sios agama patut mapinunas dumun magama, macihna antuk lēkita raris masudhiwadhani.
- (4) Pamargin pawiwahan hinucap mangda nganutin drēṣṭa Désa Pakraman Putung, sané kapatutang tur katinutin antuk krama désa swang-swang, tan singsal ring ugēr-ugēr panagara.
- (5) Sang mamurug kēcaping ring ajēng, patut karauhang ring prajuru désa, yan tan prasiddha puput, patut kapuuṣang antuk prajuru désa, lantur karawuhang ring sang amawa rāt, mangda kabawosan tur kicén pamutus.

Pawos 45

Pawiwahan sané kabawos patut sampun puput ring sajroning Désa Pakraman Putung, yan sāmpun :

- ha. Mawidhi widhana pawiwahan, sator ipun mabyakawon pawiwāhan;
- na. Kasākṣinin olih prajuru désa, lan sang amawa rāt;
- ca. Wéntén lēkita saking sang amawa rāt.

Pawos 46

Tata caraning parabian madudonan kadi ring sor:

(1) Pamargin mamadik:

- ha. Sang sapisira hugi mamadik patut masadok ring prajuru;

- na. Prajuru désa wenang pinaka saksè indik pawiwahan punika.
- (2) Ngarangkat utawi ngarorod:
- ha. Saking puruṣa patut ngawèntenang pajati antuk duta sakirangnya kalih diri, saha tan kéngin mahelètan ring arahina, yan saking dura désa ngambil kéngin mahelètan tigang dina;
- na. Yan tan wéntèn pajati, saking wirang wadu, kapatut nunasang panègdég ring prajuru désa, saha sang amawa rāt;
- ca. Pradé pajatiné tan katrima, utawi wirangnya tan wéntèn ring jèrommé, sang mapajati patut ngrauhang ring sang amawa rāt.
- (3) Yan wéntèn anak utawi krama désa sané marabian ka dura désa, ring pamuput utawi masèrah mangda kasaksinin antuk prajuru désa, mwanng maka sarana canang pangrawos masasari sékèt tali rupiah.
- (4) Sang sapisira hugi krama désa Putung, yan karawuhan tanyu praya masinutan malarapan antuk ngarorod, hugi mangda masadok mihuningang ring prajuru Désa, prajuru Désa yogya maritètès, yan tan sangkaning patut pamarggin rangkatnya, prajuru désa nguduhang mangda katur ring sang amawa rat. Yan wéntèn mamurug, yogya sang mamurug daṅdha gung artha bēras 50 kilogram.
- (5) Yan wéntèn sinalih tunggal krama désa Putung, ngamét anak istri antuk mlègandang, mamèndèt, marikoṣa, miwah salwir ipun tan sangkaning sami dēmèn, tan yogya pinuput widhi widhana pawiwahanya sadurung wéntèn pamutus saking Guru Wiséṣa.
- (6) Yan wéntèn sinalih tunggal krama Désa Putung, ngamét anak istri pinaka rabi tan manut sima drēṣṭa minakadi śāstra agama, yogya katur ring sang amawa rat mangda kabawosan saha polih pamutus.

Pawos 47

- (1) Bacakan lakṣaṇa sané ngawinang cēmēr mantuk ring Désa Pakraman Iwiré:

- ha. Drati krama, inggih punika ngrabinin anak sãmpun marabi utawi ñolong smara mawastu kadapetan, yan wénten macihna malakṣaṇa drati krama, wicaranya katur ring sang amawa rãt;
- na. Mamitra ngalang, sakadi anak makurénan naunging tan mawidhi widhana pawiwāhan, jantos tigang sasih;
- ca. Gamia Gamana Iwiré:
- Ngarangkatang mémé tēmēn;
 - Ngarangkatang tumin diya ñama, saking puruṣa mwan wadu;
 - Ngarangkatang nini kapuruṣa, lan nini saking wadu;
 - Ngarangkatang ñama dicēdar, ñama dicambra;
 - Ngarangkatang cucu tēmēn, cucu diya ñama;
 - Ngarangkatang ñama tunggal susuan;
 - Ngarangkatan pianak kalih kualon, minakadi sané sawosan sané ngawētuan sané kawastanin gamia gamana.
- ra. Salah timpal, inggih punika manusa masanggama sarēng sato.
- (2) Sang mamargi sakadi sinalih tunggal ring ajēng, patut karauhang ring sang amawarãt, tur patut mrayaścitta raga, gēnah malakṣaṇa lan désa pakraman, sasãmpun polih pamutus saking sang amawa rãt.

Pawos 48

- (1) Yan wénten anak istri bobot saking pakardi anak lanang durung madruwé rabi, saha sabda kapariangkēn, prajuru désa mangda ngutsahayang sang kalih ngalakṣanayang upacāra widhi widhana pawiwāhan, yan pradé mamurug wicaranya katur ring amawarãt, yan patēh pamutus sang amawarãt ring pamutus prajuru désa, patut danḍa bēras 90 gantang.
- (2) Yan wénten anak lanang sampun madruwé rabi, katēngēr ngarusakin anak istri, wicaranya patut katur ring sang amawarãt.
- (3) Yan wénten anak istri bobot, tan kasiddhan nalih anak lanang sané ngarddhi bobotan punika, yan hēmbas anaké alit kawastanin babiñjat.

- (4) Yan wéntén anak istri bobot, sang kadalih mobotin tan kapariangkèn mapakardi, wénang sang kadalih saha sang bobot madéwasākṣi ring catus paṭa, kasākṣinin olih prajuru désa, tur wicaranya katur ring sang amawarāt.
- (5) Pradé wéntén anak lanang sawosan ring sang kadalih mariangkèn saréng mobotin, wénang sang mariangkèn mobotin punika katur wicaranya ring sang amawarāt.
- (6) Yan wéntén raré hembas saking bobotan tan pawidhi widhana patut digelis raré punika kapéras.

Palèt 2

Indik Palas Marabian

Pawos 49

- (1) Sané kabawos ñapiyan, punika sang palas marabian, palas makurénan, sané sampun katiwakan pamutus antuk Guru Wisésa.
- (2) Yan wéntén sinalih tunggal krama désa, ngarangkatang sapian, sadurung tigang sasih utawi 105 dina, saking dina palasé, yogya sang ngarangkatang sapian punika keni danḍha pakérang manut pangargan béras sékét gantang.
- (3) Tata cara palas marabian:
 - ha. Yan wéntén krama désa mapikayun pacang palas marabian, patut matur supékṣa ring prajuru désa, olih prajuru désa wicaranya kabawosin, tur kaicén tatimbang pamutus ring sangképan désa;
 - na. Yan tatimbang prajuru désa tan katrima, wicaranya patut kalanturang ring sang amawarāt.
- (4) Krama désa sané belas marabi utawi makurénan, sasampun polih pamutus saking Guru Wisésa patut masadok raihuningang ring kliyang bañjar lan prajuru désa, mangda kadamyakang sakasép ipun asaših saking palasé.

- (5) Yan wéntèn anak istri wit saking wawèngkon Désa Pakraman Putung, ñapiyan ring dura désa, mawali kadésanya, yogya sang madruwé wirang matur supékša ring Prajuru Désa, saha mrayascitta marisuddha anaké luh punika, yan tan kaparisuddha antuk wirangnya, patut marisuddha raga, mangda kasinangguh nirmala.

Palèt 3

Indik Balu

Pawos 50

- (1) Sané kabawos balu, anak istri katinggal séda antuk rabiné, yan anak lanang séda rabinné, wiyadin katinggal ñapiyan, talér kawāstanin balu.
- (2) Yan wéntèn sinalih tunggal krama désa lanang balu, wiyadin istri balu ngawèngku karang pomahan, yogya mapaayahan asélé.
- (3) Yan wéntèn lanang balu, ngawèngku karang pomahan, madruwé santana utawi oka istri sampun hantès mayahan, yogya mayahan bulangkép.
- (4) Yan wéntèn anak istri balu, ngawèngku karang pomahan, madruwé santana utawi oka lanang sampun hantès mayahan, yogya mayahan bulangkép.
- (5) Yan wéntèn sinalih tunggal anak istri balu, maraangkat, yogya rangkat punika kapuputang antuk wirang lakiné rihin, yan babalon punika kari pagèh.
- (6) Mungging wawénangan babalon luh utawi rangda, ring indik wawarisan, minakadi sané sawos-sawosan, nganutin hugèr-hugèr sané karajégang antuk Guru Wiséša.

Palèt 4

Indik Santana

Pawos 51

- (1) Mungging santana wéntèn kalih soroh:

ha. Prati santana;

na. Santana papėrasan.

- (2) Pratisantana inggih punika, santana sané metu saking pawiwāhan kapatut.
- (3) Pradé pawiwāhan tan ngawetuang santana, kéngin ngidih santana antuk upasakši sakala nişkāla, sané kawastanin santana papėrasan.
- (4) Sang sapisira hugi sinalih tunggal krama Désa Pakraman Putung, mēras santana, nuduk mantu, yogya sangkaning radin, tunggal sidhikara, dunggal dadya, saha polih palugrahan saking guru wiśėsa.
- (5) Papėrasan sané kabawos patut ring Désa Pakraman Putung risampun macihma:
 - ha. Widhi widāna papėrasan;
 - na. Kasākšin in antuk prajuru désa, saha kasiarang ring paruman désa;
 - ca. Wéntěn lėkita palugrahan saking sang amawarāt.
- (6) Sané patut kapėras anggėn santana sakadi ring sor puniki:
 - ha. Anak sané maagama Hindu;
 - na. Papėrņahan nėdunang saking sang mēras kalih pangkėd;
 - ca. Tunggal siddhikara, tunggal dadya.

Palėt 5

Indik Wawarisan

Pawos 52

- (1) Warisan inggih punika, artha braņa saha ayah-ayahan ngupadi sukėrtha sakala nişkāla saking kaluhurannya harėp ring turunannya.
- (2) Lwiré sané wėnang kawarisin :
 - ha. Hamong-amongan ring désa, ayah-ayahan saurah-arih;
 - na. Hutang, pihutang sang kawarisin;
 - ca. Saraja druwé, bhraņa, tėgal, carik, tatamiyan, sakañcan kasugihan.

- (3) Sané patut dados ngawaris lwiré:
 - ha. Prati santana puruṣa tunggal siddhikara tunggal dadya;
 - na. Santana papérasan.
- (4) Sang sapasira hugi krama Désa Pakraman Putung, yan tilar saking Agama Hindu, tan yogya ngawaris sané kamulan patut warisin.
- (5) Ngédum wawarisan, kapatut sasampun puput mahabénang sang ngawarisang bhraṇa kalih kasugihan punika, sané dados dum, sajaba sané manggé padagingan pangaci-aci, minakadi salwiring sané manggé piranti ngalakṣanayang upacara Agama, pustaka-pustaka sané kapingitang salwiripun.
- (6) Boya waris kéngin muponin hasil manut dudonan lwiré:
 - ha. Santana luh, sadurung késah mawiwāha;
 - na. Balu luh.
- (7) Sang ngawaris kéngin mapawéh rikala mahurip pinaka jiwa dhana, tadtadan, békél, maka cihna pawéh tētēp ring oka sané késah mawiwāha.
- (8) Pawéh sang ngawaris maka cihna jiwa dhana, tatadtadan, békél, tan dados rangkungan ring apahtigayan saking artha brana pagunakayan nyané.
- (9) Pradé sajroning kulawarga wéntēn sang patut ngawaris langkungan ring adiri:
 - ha. Tungkas sajroning ngedum wawarisan dados nunas tatimbang ring prajuru désa;
 - na. Yan tan cumpu ring tatimbang prajuru désa, kéngin wicara hinucap katunasang ring sang amawarāt.

SAPTAMA SARGAH

WICARA LAN PAMIDAṆDHA

Palēt 1

Indik Wicara

Pawos 53

- (1) Salwiring wicara indik pakraman, ring wawidangan Désa Pakraman Putung, wénang rinawosan antuk Prajuru Désa, yan tan kasiddhan puput, Prajuru Désa ngaturang ring Guru Wiśéṣa bwat matatimbang.

- (2) Yan wéntèn wicara indik pakraman ring bañjar, pamakṣan, subak, minakadi sèkèha-sèkèha sawosan, yogya kabawosan antuk prajurunya sowang, yan tan kasiddhan puput, wèngang katengahang ka Désa, Prajuru Désa yogya mamawosin.
- (3) Yan pamutus wicara sané katiwakang antuk Prajuru Désa Putung, tan katinutin utawi tan kahiring antuk sang mawicara, wèngang sang mawicara nunasang pangrawos ring sang patut mamawosin, ring Guru Wiśéṣa.
- (4) Yan sang mawicara talèr tan tinut ring pamutus wicara sané katiwakang hinucap ring hajèng, prasiddha sang mawicara, kasèpèkang saking désa, kantos puput wicaranya, dosané mamandal ring désa.

Palèt 2

Indik Pamidaṇḍha

Pawos 54

- (1) Lwiring pamidaṇḍha sané wèngang katiwakang antuk Prajuru Désa, Bañjar, Subak, pamakṣan, sèkèha-sèkèha sawosan, sawawèngkon Désa Pakraman Putung, sakadi ring sor puniki :
 - ha. Daṇḍha artha;
 - na. Upasakṣi, déwa sakṣi, pangrarata, sumpah;
 - ca. Daṇḍha pañangaskara, lwiré : mrayascita, marisuddha, miwah salwir ipun;
 - ra. Daṇḍha kasèpèkang;
 - ka. Pamidaṇḍha sawosan manut palugrahan guru wiśéṣa.
- (2) Patiwak pamidaṇḍha, manut hunggwan wicarané swang-swang, minakadi wèrat ringan wicara hinucap, lwiré:
 - ha. Yan wicara ring désa pakraman, yogya kapidaṇḍha antuk désa, munggwing dadaṇḍhan mantuk ka désa:

- na. Yan wicara ring Bañjar Patus, katiwakin pamidaᅇdha ring bañjar ika, dadaᅇdhan mantuk ka bañjar;
- ca. Yan wicara ring Pamakᅇan, ring subak, ring sēkēha-sēkēha sawosan, ring kuwu tēmpēkanya sowang, munggingwring dadaᅇdhan mantuk ring kuwu tēmpēkanya.
- (3) Agung alit dadaᅇdhan, manut panglokikan agung alit wērat ringan kasisipanē, sanē mungguh ring awig-awig gagaduhanya sowang, minakadi paswara pinaka pamutus pasamuhan.
- (4) Jinah utawi artha brana pamidanda dados druwēn bañjar, sēkēha-sēkēha utawi désa pakraman.

ASTAMA SARGAH
NGUWAH-NGUWUHIN AWIG-AWIG

Pawos 55

- (1) Sanē wēnang uwahin inggih punika, pasukrētan, paswara, pamutus pararēm, wiyadin pamutus pasamuhan miwah sanē sawosan sapanunggilan ipun.
- (2) Sanē wēnang uwuhin inggih punika, pasukrētan, paswara, pamutus pararēm, wiyadin pamutus pasamuhan miwah sanē sawosan sapanunggilan ipun.
- (3) Indik nguwahin kalih nguwuhin pasukrētan, paswara, pamutus pararēm, wiyadin pamutus pasamuhan miwah sanē sawosan, manut tata kramaning pasamuhan.
- (4) Indik nguwahin kalih nguwuhin awig-awig, manut tata kramaning pasamuhan, sasampun nunas tatimbang ring Guru Wiśēᅇa kalih polih palugrahan sang amawa bhumi.

NAWAMA SARGAH

P A M U P U T

Pawos 56

- (1) Awig-awig puniki mawāṣṭa : “Awig-Awig Désa Pakraman Putung”.
- (2) Awig-awig puniki pinaka bantang sahananing awig-awig, paswara, pasukrétan, miwah salwir ipun, sané manggé ring bañjar patus, pamakṣan pura, subak, sèkèha-sèkèha sané wéntèn sajroning Désa Pakraman Putung.
- (3) Bañjar, kayangan, pamakṣan, subak, sèkèha-sèkèha sané wéntèn sajroning Désa Pakraman Putung wénang ngawangunang awig-awig, pasukrétan, paswara, gagaduhan, swang-swang, nanging daging ipun tan yogya singsal, tungkas ring Awig-awig Désa Pakraman Putung.

Pawos 57

- (1) Salwiring sané durung mungguh ring Awig-awig puniki, kaungguhang sajroning paswara, pamutus pasamuhan Désa Pakraman Putung.
- (2) Drēṣṭa kuna sané kari dados anggé, yan tan tungkas ring daging awig-awig Désa Pakraman Putung manut kojaring śāstra Agama Hindu, hanut ring ugèr-ugèr nagara, saha kaputusan sajroning paruman Désa Putung.

Pawos 58

- (1) Awig-awig Désa Pakraman Putung, pawangun Krama Désa Putung, kapastika manut upacāra Agama Hindu, kāla dina , śāsih
Tanggal utawi panglong , rah , tēnggèk , Isaka
magènah ring Pura Pusèh Putung, kapuput antuk Ida Padaṇḍha
saking Griya

(2) Awig-awig puniki kalingga tanganin antuk Prajuru Désa, minakadi: Pamasékan, Kabayan, Pañarikan, Kliyang Bañjar Patus, Kliang Krama Désa Siangolas, kasakşinin antuk Kliyang Bañjar Dinas Putung, Prabékél Duda Timur, Camat Selat, kakukuhang antuk Bupati Karangasém.

(3) Awig-awig puniki kalakşanayang ngawit dina 27-10-2005, kantos salantur ipun.

(4) Lwir sang ngalingga tanganin:

wraspati paing Medangcia

ha, Prajuru Désa:



1. Pamasékan,

(I Komang Sutarja)

2. Kabayan,

(I Wayan Rangga)

4. Patangan, minakadi

Kéliang Bañjar Patus,

(I Wayan Pondra)

3. Pañarikan,

(I Made Puja)

5. Kéliang Krama Désa

Siangolas,

(I Komang Sutarja)

na. Maka sākşi:

Kliyang Bañjar Dinas Putung,

(I Ketut Sudana)

Pərbékél Désa Duda Timur,

(I Wayan Suparta)

Camat Selat,

(Drs. I Wayan Miasa)

- ca. Kalēkitayang ring Kantor Bupati Karangasēm:
duk rahina,.....tanggal Masēhi.....
Register Nomor:.....

BUPATI KARANGASEM,

(I WAYAN GEREDEG)

LAMPIRAN I

SUSUNAN PANITIA PERUMUS PENJULIHAN AWIG - AWIG
DESA PEKRAMAN PUTUNG

Pelindung	:	Kuspika Kecamatan Selat
Penasehat	:	1. Bendesa Pekraman Putung 2. Kepala Dusun Putung 3. Kepala Desa Buda Timur
Ketua Umum	:	Jro Mangka Gunaksa
Ketua I	:	I Made Puja
Ketua II	:	I Ketut Sudana
Sekretaris I	:	I Wayan Serata
Sekretaris II	:	I Wayan Maura
Bendahara I	:	I Ketut Alit
Bendahara II	:	I Wayan Rangga
Pembantu	:	I Nyoman Serintia I Wayan Bangin I Made Mandra I Made Teresna I Wayan Subrata I Wayan Gelgel I Ketut Daging I Wayan Pondra I Wayan Daging Mangku Suta